

Volda og Ørsta Reinhaldsverk IKS
Torvmyrane 29
6160 Hovdebygda

Nye Volda Kommune
v. Rådmann Rune Sjurgard
Stormyra 2 Rådhuset
6100 Volda

Dykkar ref: Vår ref: PB Dato: 27.11.18

SÆRUTSKRIFT - MELDING OM POLITISK VEDTAK – FORSLAG TIL REVISJON AV FORSKRIFTER FOR AVFALL OG SLAMTØMING VOLDA OG ØRSTA KOMMUNAR.

Vi melder med dette frå at styret i VØR i sak 35-18 den 13.11.18 gjorde slikt samrøystes vedtak i sak 35-18 om revisjon av forskrifter for renovasjon og slam som skal gjelde frå 2020, i Nye Volda og Ørsta Kommunar.

Praksis hittil i Volda og Ørsta Kommunar, er at administrasjonen i kommunen har handsama det vidare forskriftsarbeidet, og at VØR deretter har fått i ansvar å setje forskriftene ut i livet når nye forskrifter er vedtekne og kunngjorde.

**Styresak 35-18 Forslag til revisjon av forskrifter for avfall og slamtøming
Volda og Ørsta Kommunar.**

Vedtak: (5 røysteføre)

Styret vedtek å sende forslag til reviderte forskrifter over til Volda og Ørsta Kommune for politisk handsaming.

Handsaminga

Samrøystes vedteke. Administrasjonen vert beden om å framstille abonnementinndelinga på ein meir skjematisk måte.

Saksutgreiing.

I samband med at Hornindal skal verte ein del av Nye Volda Kommune, må forskriftene for renovasjon og slam endrast med verknad frå 2020.

Vi har tre tilnæringsmåtar til revisjonen. Først har vi undersøkt om der er nye overordna lovkrav som har kome til sidan siste revisjon i desember 2017.

Deretter har vi sett på om der er lokale tilhøve som bør inn i forskriftene. Og det tredje er å samanlikne forskriftene til Hornindal med Volda og Ørsta sine, for å få det beste slik vi ser det, frå begge forskriftene.

Hornindal sin renovasjonsforskrift er ein del av Nordfjord Miljøverk IKS (NoMil) sin forskrift. NoMil er renovasjonsselskapet for Nordfjord, og har ansvaret for renovasjon i 7 kommunar og om lag 32000 innbyggjarar.

1. Nye lovkrav.

Frå lovgjevar er det kome forslag til forskrift om lovpålagt innsamling av matavfall/våtorganisk avfall og plastemballasje. Dette er alt inne i forskriftene frå desember 2017. Hornindal har hatt innsamling av matavfall ei årrekkje, og VØR startar opp frå 2019.

2.a. Nye og endra tiltak foreslått frå VØR - Raud boks

Raud boks for farleg avfall vart utlevert til alle abonnentar våren 2018, og innsamlingsresultatet etter seks månader, gav svært godt resultat. Vi samla inn nesten 17 tonn farleg avfall frå bygdene. Ordninga med ubemanna mottak som vi hadde tidligare, gav til samanlikning 14 tonn for heile året 2017.

Opplegget er slik at innbyggjarane får høve til å levere innhaldet i disse boksane på sentrale innsamlingspunkt, eller på miljøstasjonen i Hovdebygda. Innbyggjarane vert varsla på førehand med SMS om aktuell dag og tid for innsamlinga.

Raud boks tilbodet må inn i forskriftene for at alle abonnentar skal få ein juridisk rett på denne oppsamlingseininga.

I § 3 er dette tatt inn i definisjonane av kva eit abonnement inneheld.

I § 8c) om bringeordning, er levering til oppsamlingspunkt beskrive, og at innsamling vert arrangert to gangar pr. år.

b. Plastemballasje.

Eit av samfunnsoppdraga til avfallsbransjen er å levere reine fraksjonar som kan gå som råvare til produksjon av nye varer. Regjering og storting forsterkar dette, ved at innsamling av plastemballasje no blir lovpålagt, heimla i nasjonal forskrift.

Innsamla mengder hos VØR er i 2018 komne opp på vel 11 kg plastemballasje pr. innbyggjar pr. år. Kanskje av den grunn har vi fått ei ny utfordring. Plastemballasjen frå sekkar som ikkje er skikkeleg saman knytte eller sekkar som går sund under innsamling, ureina papiret i lassa. Vi meiner dette er eit midlertidig problem som må og kan løysast.

Vi er ikkje klare på kva korrigerande tiltak skal vere i dag. Men seinast i 2019 må det finne sin løysing.

Først vil vi prøve utsortering på miljøstasjonen som eit rimeleg strakstiltak. Alternativet med innsamling av plastemballasje på eigne ruter gir kanskje eit enda betre resultatet, men er og mest kostbart. Ca kr 250,- på alle abonnement med dagens prisar.

Administrasjonen sitt forslag er å utgreie dette, med sikte på å få ei sak fram for styre og representantskap i 2019.

Dette er bakgrunnen for at det i forskriftene § 7a) siste ledd ligg ei fullmakt til styret om å fastsette endra innsamlingsmetode.

2. *Hornindal sine forskrifter samanlikna med Volda og Ørsta sine.*

Hornindal og NoMil sine forskrifter er lik Volda og Ørsta sine, i mykje. Men noko forskjell er der. Eg drøftar ikkje alle punkta med forskjellar, men tar opp det som eg opplever er dei viktigaste.

NoMil har generelt meir mynde frå kommunestyra enn VØR til å godkjenne vegar, fastsette kva avfallsfraksjonar som skal samlast inn, og fastsette anna særskilt regelverk. Mitt råd er å vidareføre dagens praksis i Volda og Ørsta, der avgjersmynde i stor grad ligg i kommunestyra.

a. *Ein person husstandar.*

Hornindal har i gebyrforskrifta ei abonnementtype for husstandar med ein person i. Gebyrforskrifta er ikkje til handsaming no, men sidan forskrifta i Volda og Ørsta er annleis oppbygt enn Hornindal sin, må spørsmålet om ein person husstand drøftast no, slik eg ser det.

Dette var eit tema i Volda og Ørsta rundt 1999, i samband med Avfallsplanen 1999-2003 som kommunestyra den gangen vedtok.

Konklusjonen vart ei inndeling slik vi fortsatt har det, der ein gjekk bort frå ein type abonnement likt for alle (52 sekkar pr år), og innførte eit gebyrsystem der hentefrekvens, samarbeid og storleik på behaldarar var virkemiddel for å stimulere til redusert avfallsproduksjon. Dette femnde om alle eigedomar utan omsyn til tal personar i husstandane. Ein person husstandar kunne velje den sjeldnaste hentefrekvensen og dei minste behaldarane på same måte som familiane som var flinke å sortere.

Ordning basert på talet personar i gebyreininga vart vurdert, men gått vekk frå. Personvern grunnar var eit argument som var brukt. Objektive kriteria for å stimulere til låg avfallsproduksjon for alle, var eit anna argument. Enkle kontrollregimer for å sikre at dei som skal betale faktisk gjer det, var eit tredje argument.

I 2018 fekk vi ny personvernlov. Intensjonen i lovverket slik vi forstår det, er å sikre enkeltindividet sine rettar betre enn før, og helst avgrense mest mogeleg at «storebror ser deg». Vi meiner at å innføre ein person abonnement, ikkje er eit skritt i den retning. Min tilråding er å vidareføre Volda og Ørsta Kommunar sitt abonnementsystem som stimulerer til redusert avfallsproduksjon ved samarbeid om oppsamlingseining og storleik på behaldarar.

b. *Hytter og Fritidshus*

Tilnærminga til fritidshusrenovasjon er annleis i Hornindal enn i Volda og Ørsta. Hos VØR har alle fritidseigedomar med innlagt straum gebyr, føreset at dei ikkje er plasserte meir enn 1 km i luftlinje frå offentleg veg. Dei utan straum har ikkje gebyr. Valfridomen er knytt til val av enkeltbehaldarar, for den som vil ha det.

Gebyra for hytter og fritidshus hos Hornindal er differensierte utifrå standard på fritidshusa. Alle er med i ordninga. I tillegg er fast monterte campingvogner utanom campingplass underlagt gebyrplikt.

Sett litt forenkla så er tilnærminga i Hornindal at høg standard fritidshus som kan nyttast heile året, får høgste gebyret. «Sommarhytter» betalar låg sats.

Hytte med heilårsveg, straum og vatn/ kloakk betalar i Hornindal eit gebyr på 50 % av standard hushaldningsgebyr. Hytte med enten heilårsveg, straum og vatn/kloakk betalar 30 % gebyr av standard hushaldningsgebyr. Og til slutt så betalar hytte/ fritidshus utan heilårsveg, straum eller innlagt vatn /kloakk, men som er større enn 20 kvm. eit gebyr på 10 % av standard hushaldningsgebyr.

Dersom dette vert innført i Volda og Ørsta, ville det utvide gebyrgrunnlaget noko. Dei aller fleste i form av 10 % gebyr. Men og nokre moderne hytter med energi frå gass, solcelle og innlagt vatn / kloakk vil kome inn i ordninga. Disse er med dagens regelverk hos VØR utanfor gebyrplikt.

Hittil i 2018 har VØR samla inn ca. 150 tonn med hushaldningsavfall frå hytter og fritidshus. Det representera om lag 135 kg pr. fritidseigedom. Vårt inntrykk er at det i all hovudsak er hushaldningsavfall i plastnett. Noko avfall frå reisande i bubilar er der nok og, og det har vi ikkje mottaksplikt for. Men det er uansett betre det hamnar der enn i naturen.

Mengdene fortel tydeleg at hytte og fritidshus brukarane treng tilbodet. Tilbakemeldingar til VØR, går elles på at ein og får inn avfall og frå fritidshus utan gebyr i containerane for avfall frå hytter og fritidshus. Det er eit argument for Hornindal sin abonnementsordning.

Samfunnsutviklinga framover vil vere å utvide tilbodet med fleire sorteringstilbod slik som hos dei fast busette.

Fritidshus renovasjon vart vedteke i 2013 i VØR, og særskilt i starten var der fleire innspel om at gebyra burde vere differensierte utifrå standard og dermed høve til bruk. Høg standard hytter kan ein bruke heile året, medan ikkje isolerte hytter er best eigna til sommarbruk.

Det lyttar vi til, og tilrår derfor at Hornindal sin standard vert gjort til ny standard for Volda og Ørsta. Iverksettingstidspunkt vert bestemt av styret i VØR.

Vi har ikkje tatt inn fast plassert campingvogner utanfor campingplass, då dette ikkje har noko omfang å tale om, det vi har registrert.

Vi meiner vidare at valfridomen til fritidshus abonnentar med eigen behaldar, vert vidareført. Gebyrsats for disse vert fastsett i det årlege gebyrvedtaket.

Differensierte gebyr for hytter og fritidshus er lagt inn i § 3b.

c. Reduksjon for hushaldningsabonntar med meir enn 300 meter fram til hentepunkt.

NoMil gir etter søknad, reduksjon i renovasjonsgebyr for heilårs busette eigedomar som har meir enn 300 meter fram til tilvist hentepunkt. Dette gjeld slik vi forstår eldre kommunale og eller fylkeskommunale vegar med akseltrykk på 6 tonn og vegbreidde under 3 meter, der renovasjonsbilen ikkje kjem seg fram på forsvarleg og lovleg vis. Vi foreslår at denne ordninga vert tatt inn i Volda og Ørsta sine nye forskrifter, og presiserar at den kan omfatte heilårs og halvt års ordningar. Vi har tatt inn dette i § 7d, der styret avgjer satsen.

I Volda og Ørsta er der nokre få vegar som kan vere aktuelle. Abonnentar som bur langs disse vegane må i dag sette fram avfallet til tilvist hentestad ved køyrbar veg for å få henting.

I omfang talar vi om ca. 10 abonnentar på vinters tid. 2-3 på sommarhalvåret. Kor mange nye vi får etter at Hornindal kjem med, har vi ikkje oversikt over.

Slaminnsamling frå separate slamavskiljarar har Hornindal Kommune ansvaret for i Hornindal, medan VØR har ansvaret for dette i Volda og Ørsta. Vi rår til at dette går inn i VØR sitt ansvarsområde frå 2020. Tilsyn, oversikt og anbodskonkurransar krev særskildt kompetanse, og vi trur ikkje at det er effektivt å spreie dette utover på fleire aktørar.

Dagens forskrifter i Volda og Ørsta finn ein her:

<https://lovdata.no/dokument/OV/forskrift/2017-12-14-2405>

Hornindal sine renovasjonsforskrifter finn ein her:

<http://www.nomil.no/images/PDF/standardforskrift-2011-vgsy.pdf>

Forskrifter med forslag til endringer. Alle endringer er skrevet med *raud* skrift.

Forskrift for handsaming mv. av avfall og slamtøming, Volda og Ørsta kommunar, Møre og Romsdal

Kapittel 1

§ 1.Mål for avfallssektoren

Forskrifta har som mål å arbeide for at avfall som oppstår vert handsama på ein trygg, kostnadseffektiv og miljørett måte i samsvar med nasjonal avfallspolitik.

§ 2.Virkeområde

Denne forskrifta gjeld kjeldesortering, oppsamling, innsamling og transport av alle typar avfall og slam som kommunane sjølvpålagt, etter forureiningslova eller ved delegering frå overordna forureiningsmynde, er tillagt mynde over. Dette inkluderer farleg avfall frå hushaldningar og bedrifter dersom mengda ikkje overstig den grensa som til ei kvar tid gjeld i avfallsforskrifta.

Denne forskrifta omfattar alle registrerte grunneigedomar i Volda og Ørsta, inklusiv kvar enkelt seksjonerte del av bygning og kvar enkelt sjølvstendige brukseining i bygning. Også fritidseigedommar.

VØR avgjer i tvilstilfelle kva som reknast som sjølvstendig brukseining i bygning. VØR kan gi nærare retningsliner for gjennomføring av avgjerdene i forskrifta.

§ 3.Definisjonar

a) Abonnement

Standardabonnement:

- 1 stk. 140 l avfallsdunk for våtorganisk avfall (matavfall) med henting kvar 2 veke.
- 1 stk. 140 l avfallsdunk til restavfall, med henting kvar 4. veke.
- 1 stk. 140 l avfallsdunk til papp, papir, drikkekartong og plast i eigen returplastsekk, henting kvar 4. veke.
- 1 stk. 140 l avfallsdunk for glas og metallemballasje kvar 13. veke
- **1 stk. raud boks for farleg- og elektrisk/elektronisk avfall.**

Standard pluss abonnement:

- 1 stk. 140 l avfallsdunk for våtorganisk avfall (matavfall) med henting kvar 2 veke.
- 1 stk. 140 l avfallsdunk til restavfall, med henting kvar 4. veke.
- 1 stk. **240 l avfallsdunk** til papp, papir, drikkekartong og plast i eigen returplastsekk, henting kvar 4. veke.
- 1 stk. 140 l avfallsdunk for glas og metallemballasje kvar 13. veke
- **1 stk. raud boks for farleg- og elektrisk/elektronisk avfall.**

Komposteringsabonnement:

Krev at der ligg føre særskild kontrakt med VØR om kompostering av alt våtorganisk og hageavfall som oppstår hos abonnenten.

- 1 stk. 140 l avfallsdunk til restavfall, med henting kvar 4. veke.

- 1 stk. 140 l avfallsdunk til papp, papir, drikkekartong og plast i eigen returplastsekk, henting kvar 4. veke.
- 1 stk. 140 l avfallsdunk for glas og metallemballasje kvar 13. veke
- 1 stk. raud boks for farleg- og elektrisk/elektronisk avfall.

Kompostering pluss abonnement:

Krev at der ligg føre særskild kontrakt med VØR om kompostering av alt våtorganisk og hageavfall som oppstår hos abonnenten.

- 1 stk. 240 l avfallsdunk til papp, papir, drikkekartong og plast i eigen returplastsekk, henting kvar 4. veke.
- 1 stk. 140 l avfallsdunk for glas og metallemballasje kvar 13. veke
- 1 stk. raud boks for farleg- og elektrisk/elektronisk avfall.

Storhushaldabonnement:

- 1 stk. 140 l avfallsdunk for våtorganisk avfall (matavfall) med henting kvar 2 veke.
- 1 stk. 240 l avfallsdunk til restavfall, med henting kvar 4. veke.
- 1 stk. 240 l avfallsdunk til papp, papir, drikkekartong og plast i eigen returplastsekk, henting kvar 4. veke.
- 1 stk. 140 l avfallsdunk for glas og metallemballasje kvar 13. veke
- 1 stk. raud boks for farleg- og elektrisk/elektronisk avfall.

Storhushaldabonnement pluss:

- 1 stk. 140 l avfallsdunk for våtorganisk avfall (matavfall) med henting kvar 2 veke.
- 1 stk. 240 l avfallsdunk til restavfall, med henting kvar 4. veke.
- 1 stk. 340 l avfallsdunk til papp, papir, drikkekartong og plast i eigen returplastsekk, henting kvar 4. veke.
- 1 stk. 140 l avfallsdunk for glas og metallemballasje kvar 13. veke
- 1 stk. raud boks for farleg- og elektrisk/elektronisk avfall.

Samarbeidsabonnement:

Krev deling med nabo i nærleik til kvarandre og at abonnentane seg imellom har avtale om reinhald og framsetting av dunkane. Ved tvil vert dette avgjort av VØR.

- Henting av avfallsdunk for våtorganisk avfall (matavfall) med henting kvar 2 veke.
- Henting av avfallsdunk til restavfall, med henting kvar 4. veke.
- Henting av avfallsdunk til papp, papir, drikkekartong og plast i eigen returplastsekk, henting kvar 4. veke.
- Henting av avfallsdunk for glas og metallemballasje kvar 13. veke
- Dei samarbeidande partar har 1 stk. raud boks for farleg- og elektrisk/elektronisk avfall kvar.

Abonnement for fellesrenovasjon:

Er abonnement med oppsamling av avfall i nedgravne containerar.

Fritidsbustadabonnement:

Er abonnement for dei med fritidshusvære enten dei har eigen avfallsbeholdar eller må levere avfallet i samleavfallsbeholdar for fritidshus/hytter.

Henteavtale

Er avtale mellom abonnent og VØR om henting, tøming og tilbakesetting av avfallsdunk på avstandar utover vegkanthenting.

b) Abonnementeining

Fritidsbustad er husvære utan fast busetnad, som ikkje vert brukt over 4 månader i året. Ein kan ikkje ha fast bustadadresse ved eigedomen. Fritidsbustad er ikkje omfatta av § 10 c og d i denne forskrift. **Abonnentar til kategori 1- 4 leverar sitt avfall til felles oppsamlingspunkt for fritidshus renovasjon.**

1.1.Kategori 1 (høg sats. 50 % av gebyr renovasjon standard)

Hytter, fritidshus og bustadhus der det ikkje er fastbuande, og som oppfyller alle 3 kriteria :

- a. Innlagt straum
- b. vatn og avlaup
- c. Veg som er køyrbar heile året eller båtbygge.

1.2.Kategori 2 (middels sats. 30 % av gebyr renovasjon standard)

Hytter, fritidshus og bustadhus der det ikkje er fastbuande, og som ikkje fell inn under kategori 1-3-4 og som oppfyller minst 1 av kriteria i kategori 1

1.3.Kategori 3 (låg sats. 10 % av gebyr renovasjon standard)

Alle hytter og bustadhus som er større enn 20m² BRA, og som ikkje oppfyller nokon av kriteria i kategori 1-2-4

1.4.Kategori 4 (fritekne)

Hus, hytter, sel mindre eller lik 20 m² BRA.

Huseigar kan søkje VØR om varig fritak for hus som stå til nedfalls.

Styret i VØR vedtek iverksettingstidspunkt for kategori 1,2,3 og 4.

Gebyreining/brukseining er husvære som er bygd eller ombygd til bruk for ein eller fleire personar og som har eigen inngang. Husværet kan anten vere leilegheit eller hybel. Ei gebyreining er ei leilegheit med fleire bruksrom dvs. minst eit rom og kjøkken (eventuelt tekjøkken) og eigen inngang.

Hybel er ½-gebyreining/brukseining og er husvære utan kjøkken og er eit rom med eigen inngang, der det er tilgang til vatn og toalett.

c) Abonnent

Abonnent er eigar eller festar av eigedom som er tilslutta den kommunale renovasjonsordninga jf. forureiningslova § 34, fjerde ledd. Leigetakar/brukar av eigedom kan unntaksvis stå som abonnent/rekningsmottakar dersom dette vert avtalt mellom VØR og eigar. Eigaren er likevel økonomisk ansvarleg for uteståande gebyr leigetakaren/brukaren måtte ha overfor kommunen. Dersom eigedomen er festa vekk for minst 30 år, eller i dei høva festet kan forlengjast utover 30 år, skal festaren reknast som abonnent.

Leigetakar/brukar: Dersom leigetakar/brukar og abonnent ikkje er same juridiske person, er leigetakar/brukar sine plikter dei same som abonnenten sine plikter, med unnatak av det økonomiske forholdet til VØR.

d) Avfall

Avfall er lausøyregjenstandar og stoff som skal regnast som avfall i høve forureiningslova sin § 27 og Miljødirektoratet, heretter kalla MD sin vegleiar TA-2001/2003.

EE-avfall (elektrisk og elektronisk avfall): Kasserte EE-produkt, det vil seie produkt som er avhengig av elektrisk straum eller elektromagnetiske felt for korrekt funksjon. MD avgjer i tvilstilfelle kva som er ee-produkt, jf. avfallsforskrifta kap. 1.

Farleg avfall (tidligere spesialavfall): er avfall som det ikkje er føremålstenleg å handtere saman med hushaldningsavfall eller næringsavfall fordi det kan medføre alvorleg forureining eller fare for menneske eller dyr. Døme på helse- og miljøfarleg avfall kan vere maling, spillolje, løysemiddel, plantevernmiddel og bilbatteri, jf. ureiningslova § 27a tredje ledd og avfallsforskrifta kap. 11.

Glas og metallemballasje: Glas eller metallemballasje frå hushaldningar.

Grovavfall, sjå restavfall.

Hushaldningsavfall er vanleg avfall frå private hushaldningar, medrekna større gjenstandar som inventar og liknande frå hushaldningar og fritidsbustader, jf. forureiningslova § 27 andre ledd og MD sin vegleiar TA-2001/2003.

Kompostering er biologisk nedbryting og stabilisering av organisk avfall med lufttilgang der restproduktet vert jord.

Næringsavfall er avfall frå offentlege og private verksemder og institusjonar, jf. forureiningslova § 27 tredje ledd og MD sin vegleiar TA-2001/2003.

Returplast er plastemballasje som kan gå til attvinning i eigen returplastsekk som VØR leverar ut kvart år til alle abonnentar.

Restavfall er avfall som vert igjen etter kjeldesortering eller sentralsortering av hushaldning- eller næringsavfall.

Risikoavfall er sprøytespissar, bandasjar og anna smittefarleg avfall frå helseinstitusjonar/kontor mv.

Våtorganisk avfall er lett nedbrytbart avfall av animalisk eller vegetabilsk opphav, slik som matavfall, hageavfall og planterestar.

e) Oppsamlingseining

Avfallsbeholdar/avfallsdunk/fellescontainer/nedgravne anlegg er ei oppsamlingseining for avfall som VØR stiller til rådvelde for abonnentane. VØR kjøper, leverer ut og eig avfallsbeholdarane. VØR skiftar ut avfallsbeholdarane når det er naudsynt. Nedgraven løysing føreset avtale med VØR, jf. § 2 tredje ledd.

Det må berre nyttast avfallsbeholdarar tildelt/godkjent av VØR. Avfallsbeholdarane er registrert på den einskilde eigedom og skal ikkje flyttast ved endringar i eigar eller festetilhøve.

Avfallssekk er 100 liter svarte sekkar merka med VØR-logo. Slike godkjende avfallssekkar kan kjøpast hjå VØR og nyttast som ekstrasekk ved avfallstoppar.

Returplastsekk er gjennomsynlege sekkar som abonnentane skal bruke til å ha rein og tørr emballasjeplast i for attvinning. VØR leverar slike sekkar ut for eit år om gongen.

Raud boks for farleg avfall er ei offentleg godkjent 28 L boks for farleg avfall, som er konstruert slik at den ikkje kan opnast av barn eller ville dyr, og kan transporterast utan krav til ADR.

f) Sortering

Bringeordning er eit kjeldesorteringssystem der abonnenten sjølv bringer sitt kjeldesorterte avfall til ein mottaksplass t.d. returpunkt eller miljøstasjon.

Henteordning er eit kjeldesorteringssystem der kjeldesortert avfall vert henta av godkjent innsamlar så nær kjelda som praktisk råd.

Kjeldesortering er når abonnenten eller annan avfallsprodusent held visse avfallstypar fråskilt og legg desse i særskilde oppsamlingseiningar eller bringer dei til tilviste mottaksstader.

Returpunkt er lokalt ubemanna oppsamlingsstad der publikum kan levere/sortere ein eller fleire avfallsfraksjonar.

Miljøstasjon/gjenbruksstasjon er eit spesielt tilrettelagt område med organisert oppsamling av separert avfall. Alle gjenvinnbare fraksjonar kan leverast på miljøstasjonen i tillegg til restavfall og farleg avfall.

g) Slam

Tvungen slamtøming er ei ordning for tøming av slamavskiljarar og tette tankar og gjeld for alle eigedomar som har slamavskiljar eller tett tank.

h) VØR

VØR er Volda og Ørsta Reinhaldsverk IKS som Volda kommune og Ørsta kommune har gitt delegert ansvar i eigen selskapsavtale til å drive med innsamling, sortering og transport av avfall og slam i medhald av forureiningslova § 30, § 34 og § 83. VØR har eigedomsretten til avfall som vert samla inn av eller til VØR.

§ 4. Kommunal innsamling av avfall

Kommunane har med grunnlag i forureiningslova § 30 1. ledd innført tvungen renovasjon for hushaldningsavfall. Alle eigedomar der det går føre seg aktivitet som fører til at det oppstår hushaldningsavfall, vert omfatta av tvungen renovasjonsordning. Tvungen kommunal renovasjon gjeld også for fritidseigedomar.

Ingen må samle inn hushaldningsavfall, irekna papp, papir, drikkekartong, plast og andre avfallstypar til gjenvinning, utan samtykke frå kommunane.

Det er ikkje tillate å brenne hushaldnings-, nærings-, eller farleg avfall anna enn i særskilt godkjende forbrenningsanlegg. Det er heller ikkje tillate å grave ned eller kaste hushaldningsavfall. Hageavfall og anna våtorganisk avfall kan etter avtale komposterast på eigen eigedom.

For å sikre best mogleg økonomisk, ressurs- og miljømessig handtering av avfallet, er abonnenten pliktig til å gjennomføre dei sorterings- og leveringsordningar av avfallet som VØR til ei kvar tid gjer vedtak om.

Det er ikkje tillate å levere risikoavfall frå helseinstitusjonar innblanda i anna hushaldnings- eller næringsavfall. Dette avfallet skal kjeldesorterast og leverast separat til godkjent mottakar t.d. godkjende handsamingsanlegg for slikt avfall ved større helseinstitusjonar eller destruksjon ved godkjende mottakarar for slikt avfall. VØR si innsamlingsordning vil ikkje gjelde patologisk avfall.

Med grunnlag i § 11-10 i avfallsforskrifta, tilbyr VØR mottak av farleg avfall frå hushaldningar. Denne fraksjonen skal leverast til dei utplasserte mottaka for slikt avfall eller miljøstasjon. Verksemdar med mindre mengder spesialavfall kan og nytte seg av den kommunale ordninga ved å levere avfallet ferdig deklart på miljøstasjonen.

§ 5. Avfall som ikkje er omfatta av kommunal innsamling

- a) Farleg avfall frå verksemd med meir enn 1000 kg spesialavfall/år.
- b) Næringsavfall, jf. § 3 d 7. ledd.

Den som har farleg avfall og næringsavfall er eigar av avfallet, og må sjølv syte for å bringe dette avfallet til godkjent avfallsanlegg eller til anna godkjend handsaming. VØR eller kommunen vil gi opplysningar om kvar slikt avfall kan/skal leverast.

§ 6. Heimekompostering av våtorganisk avfall og hageavfall

Hageavfall bør så langt det er råd komposterast i eigen hage, alternativt leverast til miljøstasjonen.

Abonnentar med nok hageareal, får høve til å heimekompostere våtorganisk avfall og hageavfall. Kommunestyra kan i slike høve gje redusert gebyr etter nærare avtale med VØR. I avtalen vert det fastsett krav til drift av heimekomposteringa, m.a. at komposteringa skjer på ein hygienisk tilfredstillande måte, som ikkje tiltrekkjer seg skadedyr, gjev sigevatn, vond lukt eller verkar sjenerande for omgjevnadene. VØR vil gi rettleiing om drift av kompostbingen, og føre kontroll med at godkjende bingar og avtale med VØR vert fylgd. Abonnenten må skaffe seg kompostbinge for eiga rekning.

Ved brot på vilkåra i avtalen, kan VØR seie han opp og påleggje abonnenten å levere avfallet i samsvar med § 4 og § 12 i denne forskrift.

§ 7. Oppsamlingseining og plasseringa av denne

- a) Oppsamlingseininga

Oppsamlingseining er den til ei kvar tid godkjende avfallsbeholdar/sekk for innsamling av hushaldningsavfall utlevert av VØR. Abonnementen/brukar er pålagt å notere nummeret på oppsamlingseininga og opplyse om dette når han tek kontakt med VØR i høve avfallsordningane.

Abonnementen er ansvarleg for reinhald av behaldarane. Behaldarane skal berre nyttast til avfallshandtering i samsvar med denne forskrifta. Ved annan bruk av behaldarane enn avfall i samsvar med denne forskrifta, er VØR utan ansvar for skade eller tap av innhaldet. Ved misbruk/aktløyse som skadar behaldaren skal abonnementen betale kostnaden med ny behaldar. Ved kjeldesortering av avfall til materialgjenvinning kan VØR dele ut fleire avfallsbeholdarar til same abonnent.

For rekkjehus, blokker, seksjonerte eigedomar, fritidshus, burettslag og liknande kan desse bruke felles behaldar eller nedgraven container. Reinhald, framsetting m.m. er desse brukarane sitt ansvar. Reinhald av fellescontainerar for fritidshus og nedgravne anlegg er VØR sitt ansvar. Reinhald rundt nedgravde anlegg er brukarane sitt ansvar.

Abonnementen/brukar pliktar å setje rett avfallsbeholdar fram til hentestad innan kl. 06.00 på tømmedagen for å ha krav på innsamling. VØR driv innsamling mellom kl. 06.00 og 22.00. Abonnementen/brukaren er ansvarleg for at avfallsbeholdaren ikkje valdar skade ved at han kjem på avveggar frå oppstillingsplass eller hentestad.

Abonnementen/brukaren skal bringe avfallsbeholdaren tilbake frå hentestad til oppstillingsplass same dag som den er tømt.

Abonnementen/brukaren er ansvarleg for at behaldaren vert handsama med varsemd og halden rein i samsvar med krav frå helseansvarlege myndigheiter. Hushaldningsavfallet skal vere emballert t.d. i plastnett før det blir plassert i avfallsdunken.

Alt avfall som vert sett fram for tøming skal liggje i godkjent oppsamlingseining som ikkje er fylt meir enn at loket kan latast heilt tett til. Dette for at hygieniske ulemper ikkje skal oppstå. Avfallet må ikkje pakkast fastare enn at behaldaren lett kan tømast. På vinterstid er brukaren ansvarleg for at avfallet ikkje er frose fast og dermed ikkje let seg tømme.

Ved avfallstoppar må abonnentane sjølv skaffe seg tilstrekkeleg kapasitet til avfallet sitt t.d. ved ekstrasekkar. Ved gjentatt overfylling av dunken, kan VØR påleggje den enkelte abonnent større avfallsdunk og dermed høgare gebyr, jf. § 12.

Når ein nyttar avfallssekk skal denne sikrast mot fuglar og dyr ved naudsynte tiltak som nett o.l. Sekkar som vert framborne eller leverte til sentrale oppsamlingseiningar skal vere knyta att. Vekta på sekken skal ikkje vere over 20 kg. Vekta på avfallsdunken ikkje vere over 30 kg/140 l behaldarvolum. Tap av dunk/oppsamlingseining pliktar abonnementen å melde snarast til VØR. VØR kan påleggje abonnementen å nytte alternative oppsamlingseiningar for å få til ei forsvarleg innsamling og handsaming av avfallet.

Returplastsekken skal på hentedag knytast att og plasserast opp i dunken for papir og pappavfall. **Styret i VØR har fullmakt til å vedta annleis innsamling av returplastsekken for plastemballasje.** Eventuell prising av ekstrasekkar vert fastsett av kommunestyret i samband med sak om gebyrregulativ.

b) Behaldarar for fritidsbustad

VØR plasserer ut felles avfallscontainerar og syter for naudsynt reinhald, inklusiv av hentestad og oppstillingsplass. Fritidsbustad med eigne avfallsbeholdarar vert å regulere etter § 7 a. Avfallsbeholdarar som er utplasserte og merka med fritidsbustad, skal berre nyttast av brukarar av fritidshusvære.

c) veg/hentestad

Hentestaden skal vere ved køyreveg, og vert fastsett av VØR. På hentestad skal avfallsbeholdarane stå lett tilgjengeleg på eit flatt og fast underlag i bakkenivå fritt frå portstolpar og liknande inklusiv med fri høgde for innhenting med mekanisk arm. Avfallsbeholdarane skal på hentedag stå i ein avstand 1–3 m frå vegkant (vegkanthenting). Tilkomsten skal vere fri for hindringar som kan gjere tøminga vanskeleg, slik som tersklar, trappetrinn, parkerte bilar osb. Der fleire dunkar står i lag skal avstanden mellom dunkane vere minst 30 cm.

Køyreveg kan vere både privat og offentleg veg. VØR har rett til å stille krav til vegstandard, vedlikehald, tilkomst og utforming av vegane som vert køyrde. Køyreveg som skal brukast i samband med renovasjonsordninga skal anten ha snuplass for stor bil, eller vere gjennomgåande, og renovasjonsbilane skal kunne køyre henterutene på ein lovleg og forsvarleg måte. Godkjend bilveg skal minst ha ei breidde på 3,0 m køyrebane, ei fri høgde på minst 4,0 m, styrke til å tole eit akseltrykk på minst 8,0 tonn og kurvatur og stigning tilsvarande vegklasse 4 i normalar for landbruksvegar. For å kome fram til avfallsdunken/avfallssekken skal vegen vere fri for hindringar for den som skal hente avfallet. Vinterstid skal tilkomsten vere rydda for snø, og om naudsynt vere sandstrødd.

Når vegen ikkje er tilfredsstillande brøytt eller den har slik teknisk standard at den i det heile tatt ikkje er køyrbar, skal abonnenten bringe avfallet fram til renovasjonsbilen, eller ta vare på avfallet på ein forsvarleg måte til neste hentedag. VØR kan i enkelttilfelle samtykkje anna plassering enn det som er nemnt ovanfor, mot eit ekstragebyr som vert fastsett i samband med årleg gebyrfastsetjing (henteavtale). Eigarar av fritidshus/hytter pliktar å levere avfallet sitt i tilviste avfallsbeholdarar som nemnt i denne paragraf punkt b.

d) Heilårs bustadeigedomar med veg som har kommunal vedlikehald, og som ikkje har krav på henting av avfall i sommar og eller vinterhalvåret.

Eigedomar der VØR ikkje godkjenner vegtilkomst i sommar og eller i vinterhalvåret, jfr §7c. og som har meir enn 300 meter transport av avfallet til tilvist hentepunkt, får etter søknad redusert gebyr fastsett av styret i VØR. Målegrunnlag er lengd på eksisterande veg.

§ 8.Sortering av avfallet

a) Hushaldningsavfall

Hushaldningsavfall skal kjeldesortert for dei avfallsfraksjonar det er etablert innsamlings- og mottaksordningar for. Dette vert gjort for å legge til rette for best mogleg slutthandsaming av avfallet. Avfall levert til VØR kan verte manuelt kontrollert. Ved manglande eller mangelfull sortering vil renovatør ved bruk av klistrelapp eller liknande varsle om mangelen og ikkje ta avfallet med på vanleg rute.

Fuktig avfall, skarpe eller knuselege gjenstandar mv. skal vere forsvarleg innpakka for å hindre skade på renovatørane, før plassering i avfallsbeholdaren. Varm oske må avkjølast heilt før den vert emballert og lagt i behaldaren. Oske, avfall frå støvsugar o.l. må vere skikkeleg emballert for å unngå støvplage under innhenting.

Flytande avfall skal ikkje leggjast i behaldaren. I behaldaren må det vidare ikkje leggjast større metallgjenstandar, elektrisk eller elektronisk avfall, stein og jord, hageavfall og sand/grus eller bygningsavfall. I behaldaren må det heller ikkje leggjast etsande, eksplosivt eller sjølvantenneleg avfall. Farleg avfall eller problemavfall skal ikkje leggjast i behaldaren.

Brukaren kan gjerast økonomisk ansvarleg for skader på behaldar, renovasjonsbil eller på tømme plass for renovasjonsbilen som følgje av aklaus bruk av behaldaren.

Når ein brukar avfallssekk skal den ikkje fyllast meir enn at den kan knytast att.

Avfall som er for stort eller for tungt til den vanlege innsamlingsordninga skal leverast til miljøstasjonen. Tilsvarande skal også andre typar avfall som kan gjenvinnast eller gå til ombruk og det ikkje er oppretta henteordning for, leverast til miljøstasjonen.

b) Henteordning

Alle abonnentar som inngår i tvungen kommunal avfallsordning skal kjeldesortere avfallet i følgjande fraksjonar:

- Våtorganisk avfall skal leverast i grøn behaldar med brunt lok.
- Glas og metallemballasje skal leverast i grøn behaldar med gult lok.
- Emballasjeplast skal leverast i samanknytte returplastposar i grøn behaldar med blått lok.
- Papir (aviser, tidsskrift, vekeblad, reklamepapir, papp, kartong, drikkekartong) skal leverast i grøn behaldar med blått lok.
- Restavfall skal leverast i grøn behaldar med grønt lok.

Fraksjonane skal haldast skilt og leggjast i dei utleverte avfallsbeholdarane som står heime hos kvar enkelt abonnent. Det er ikkje tillate å leggje andre typar avfall i oppsamlingseininga enn det som er nemnt ovanfor. Det er ulike tømefrekvensar for desse fraksjonane. For nærare opplysningar vert det vist til eigen informasjon. Kravet til kjeldesortering gjeld ikkje husstandane i bygda Skår.

c) Bringeordning

Andre kjeldesorterte fraksjonar med godkjent innsamlingsordning skal bringast til returpunkt, t.d tekstilar eller miljøstasjonen (større delar av papp, EE-avfall). VØR kan gjere endringar i utval og talet på fraksjonar. Farleg avfall må leverast til farleg avfall mottak eller miljøstasjonen. **Det gjeld og Raud boks for farleg- og småelektrisk avfall, der VØR arrangerer særskildt innsamling vår og haust.**

Fritidsbustader kan få tilvist bruk av felles oppsamlingseiningar for avfall. Disse skal ikkje nyttast av fast busette, verksemder, utleigehytter eller private anlegg for turisme. Brot på dette vert definert som om den aktuelle abonnent/brukar har for lite behaldarvolum/for lav hentefrekvens (jf. § 7 og § 12).

§ 9. Hygieniske krav til renovasjon

Forskriftene byggjer på dei krav til hygienisk avfallshandtering som vert fastsett av sentrale styresmakter og helsemynde i kommunane.

Gjeldande lover og forskrifter:

- a) Lov 24. juni 2011 nr. 30 om kommunale helse- og omsorgstjenester m.m. (helse- og omsorgstjenesteloven) og lov 24. juni 2011 nr. 29 om folkehelsearbeid (folkehelseloven) med kommunale helseforskrifter.
- b) Lov 13. mars 1981 nr. 6 om vern mot forurensningar og om avfall med forskrifter. Helsestyresmaktene i kommunane har eit sjølvstendig ansvar for å sjå til at helseforskriftene om handtering av avfall vert fylgd.

§ 10. Avfallsgebyr

- a) Abonnentar som vert omfatta av avgjerdene i denne forskrifta skal betale avfallsgebyr som vert innkravd av VØR. Ved registrering av ny abonnent eller ved endring av eksisterande abonnement, vert nytt gebyr rekna frå den første i månaden etter at endringa er meldt til VØR. Tilsvarande vert gebyret rekna fram til den siste dagen i månaden der gebyrplikta vert avslutta. Abonnentar som kjem inn under denne forskrifta pliktar straks å melde endringar i abonnementtilhøve til VØR. Likeeins pliktar ein å melde frå dersom personen ikkje står i gebyrregisteret for avfall. Blokker, rekkehus og liknande som er organisert som burettslag, kan få avgifta berekna og betalt samla. Det same gjeld for tilsvarande bustader når eigarane organiserer seg som felles rettssubjekt (eks. huseigarforeining).
- b) Gebyrsatsane vert fastsett årleg av kommunestyra. Gebyret med renter og kostnader er sikra etter pantelova § 6-1. Om renteplikt og inndriving gjeld tilsvarande reglar i lov 6. juni 1975 nr. 29 om eigedomsskatt til kommunane § 26 og § 27. Gebyret skal dekke alle kostnader med avfallshandteringa. For dei tenestene som er pålagde og fastsette etter denne forskrifta skal abonnenten betale eit renovasjonsgebyr til VØR pr. gebyreining. Gebyr skal og betalast for tilleggstenester som henteavtale.
- c) Gebyreiningar som står tome heile eller delar av året kan etter årleg søknad, få nedsett gebyr for:
 - samanhengande heile året 100 % og
 - samanhengande minst 6 md 50 %.Vilkåret er at avfallsbehaldarane er innleverte til VØR for den perioden det vert søkt om fritak for.
- d) Gebyrdifferensiering

For å fremje avfallsreduksjon, kjeldesortering og gjenvinning vedtek kommunen differensierte gebyrsatsar i samband med dei årlege gebyrvedtak. Gebyret vert fastsett på grunnlag av storleik på avfallsdunk, om abonnenten komposterer eller om abonnentar samarbeider om oppsamlingseining.

§ 11. Unntak/klager – praktisering

Søknader om unntak og klager på praktiseringa av denne forskrift, kan påklagast (forvaltningslova § 2b og forureiningslova § 85). Klagen skal sendast til det organet som har gjort vedtaket. Dersom klagen ikkje vert teken til følgje, vert den sendt til styret for VØR, som skal gjere endeleg vedtak.

Det at ordninga ikkje vert brukt, at bruken er tungvint eller vert sett på som unødvendig eller liknande, gjev ikkje grunnlag for fritak frå ordninga eller betalingsplikta.

Søknader/klager skal vere grunngjevne og innehalde opplysningar om eigar, adresse, gards- og bruksnummer. Kommunane delegerer mynde for avgjerd av søknader/klager til styret for VØR. Styret i VØR kan delegere mynde til å ta daglege og praktiske avgjerder etter desse forskriftene til dagleg leiar.

§ 12. Sanksjoner – straff

Dersom det viser seg at ein abonnent har for lite behaldarvolum, slik at det er fare for at avfallet vert disponert i strid med forskrifta, kan VØR påleggje abonnenten det behaldarvolumet som ein finn føremålstenleg. Byte av behaldar vil skje seinast ein månad etter at skriftleg varsel er sendt frå VØR.

Dersom det viser seg at ein abonnent ikkje har meldt i frå om gebyrpliktige abonnementeiningar eller endring i gebyrplikt som medfører tillegg i gebyret, kan VØR påleggje ekstragebyr frå den datoen som abonnementeininga(ne) vart gebyrpliktig(e). Dersom dette tidspunktet ikkje kan dokumenterast, vert abonnenten automatisk pålagt gebyr frå to år før tilhøvet vart oppdaga/registrert.

VØR kan påleggje abonnenten tilleggsgebyr om det syner seg at abonnenten ikkje sorterar avfallet sitt i samsvar med gjeldande sorteringsreglement, jf. § 8 i denne forskrift.

Utover dette kan brot på føresegnene verte straffa med bøter, jf. forureiningslova § 79 andre ledd.

Kapittel 2. Tøming av slam frå spreidde avlaupsanlegg

§ 13. Generelt

Volda og Ørsta kommune har vedteke å nytte mobil avvatning som behandlingsmetode for kloakkslam frå slamavskiljarar med godkjent avløp. Volda kommunestyre i møte 3. mai 1990 og Ørsta kommunestyre i møte 28. mai 1990.

§ 14. Tøming av slamavskiljarar m.m.

a) Melding

Melding om når tøming vil finne stad vil verte gjeve gjennom SMS/e-post/Altinn eller på annan måte som VØR finn føremålsteneleg.

b) Frekvens på tøming av slamavskiljar

Tvungen slamtømming gjeld for alle eigedomar som har slamavskiljar eller tett tank for slam. For eigedomar med fast busetjing/heilårsbustad og med toalett tilknytt slamavskiljar, skal slamavskiljar tømast ein gong kvart andre år. Andre slamavskiljarar skal tømast ein gong kvart fjerde år. Tette oppsamlingstankar skal tømast i god tid før dei er fulle og minst ein gong kvart år. I særlege høve kan VØR fastsetje annan tømefrekvens enn nemnt ovanfor.

c) VØR eller den som tømmer for VØR sine plikter

Tømming skal utførast slik at den ikkje er til ulempe for nokon med omsyn til støv, lukt eller støy. Anlegget skal forlatast i lukka stand og grinder, portar og dører skal stengjast, eventuelt låsast. Renovatør skal rapportere til kommunen alle observerte avvik ved anlegget og samla mengde slamvolum.

d) vegtilkomst til slamtank

Krav til vegtilkomst til slamtank ved tømming heile året skjer etter § 7c i disse forskrifter og gjeld tømming med standardutstyr.

Bruk av særskilt tømemateriell og høgge gebyr, tillet vegtilkomst på sommarhalvåret bygt etter Normal for landbruksvegar, vegklasse 5, Sommarbilveg for tømmertransport utan hengar. Anlegg med vegtilkomst vegklasse 5 vil ikkje ha krav på naudtømming i vinterhalvåret.

§ 15. Abonnenten sine plikter

Abbonnten skal syte for at anlegga som skal tømast er lett tilgjengelege og dimensjonerte for tømming med bil. Overdekking av kumlokk og liknande med snø, is, jord, stein eller anna skal vere fjerna av abonnenten før tøminga skal gjerast. Den som tømmer anlegget har rett til å plassere naudsynt utstyr på eigedomen for å få utført tøminga. VØR vil ikkje ta på seg krav frå skade på vegar, hagar eller liknande. Dersom vegstandarden er for dårleg, må tankeigar syte for forsterkning. Jf. også krav til veg/hentestad i § 7 c.

Dersom abonnenten ikkje har klargjort tanken for tømming eller ein må tømme tankar utanom oppsett innhentingsplan, kjem gebyr for tilkøyring i tillegg til tømepreisen.

§ 16. Avgifter ved fellesanlegg

Kommunale og private fellesavskiljarar for fleire bustadhus, bustadfelt, verksemder, industriområdar og andre type byggjeområde eller tettstader skal tømast i samsvar med det som er oppgitt i utsleppsløyve eller når VØR vurderer at tømming må gjerast.

§ 17. Avgift, innkreving, renter m.m.

Abbonnten skal betale ei årleg avgift som vert innkravd av VØR. Gebyrsatsane vert fastsett årleg av kommunestyra. Gebyret med renter og kostnader er sikra etter pantelova § 6-1 om renteplikt og inndrivning gjeld reglane i lov 6. juni 1975 nr. 29 og eigedomsskatt til kommunane § 26 og § 27.

§ 18. Klage og straff

Dette vert handsama etter § 11 og § 12 i denne forskrift.

§ 19. Iverksetting

Forskrifta trer i kraft frå 1. januar 2020 og erstattar tidlegare forskrift av 14 desember 2017 for handsaming mv. av avfall og slamtøming, Ørsta og Volda kommunar, Møre og Romsdal.

For styret i VØR

Petter Bjørdal
Dagleg leiar